



Cuireann An Chomhairle Ealaíon agus Ollscoil Chathair Bhaile Átha Cliath fáilte roimh iarratais le haghaidh Scríbhneoir Cónaithe Gaeilge don bhliain féilire 2023.

Bunaíodh an chónaitheacht chun timpeallacht spreagthach a chur ar fáil do Scríbhneoir Cónaithe, agus le tacaíocht airgeadais a sholáthar dóibh díriú ar a gcleachtas cruthaitheach féin. Anuas air sin, cuireann an chónaitheacht le fuinneamh agus spleodar na hOllscoile, agus tugtar deis do na mic léinn agus don phobal acadúil plé le scríbhneoir gníomhach ar feadh saintréimhse.

1.1 Eolas faoin gcónaitheacht

Fostófar an Scríbhneoir Cónaithe don bhliain féilire 2023 agus feidhmeoidh sé/sí i gcomhar le **Ceann Scoile Fiontar & Scoil na Gaeilge** in Ollscoil Chathair Bhaile Átha Cliath, áit a mbeidh deiseanna bheith ag plé le pobal na hOllscoile trí chéile.

Cabhrófar leis an Scríbhneoir Cónaithe plé le mic léinn agus le baill foirne. Déanfaidh an Scríbhneoir Cónaithe clár imeachtaí a dhearadh i gcomhairle le Ceann Scoile Fiontar & Scoil na Gaeilge agus d'fhéadfadh go mbeadh teagasc, ceardlanna, meantóireacht, imeachtaí poiblí nó gníomhaíochtaí eile i gceist a bheathóidh clár cruthaitheachta na hOllscoile. Ceithre huaire an chloig in aghaidh na seachtaine ar a mhéad an t-am teagmhála a bheidh ag an scríbhneoir le pobal na hOllscoile le linn an tseimeastair agus ní bheifear ag súil go múinfidh an scríbhneoir aon chuid den chroíchuraclam.

Cabhrófar leis an scríbhneoir díriú ar a c(h)leachtas féin i rith thréimhse na cónaitheachta.

Is é €30,000 an táille a íocfar leis an Scríbhneoir Cónaithe; sciar €20,000 ar fáil ón gComhairle Ealaíon agus €10,000 ar fáil ón Ollscoil. Cuirfear spás ar leith ar fáil don Scríbhneoir Cónaithe laistigh den Ollscoil, áit a mbeidh sé/sí in ann díriú ar a c(h)leachtas cruthaitheach féin.

Íocfaidh An Chomhairle Ealaíon an táille iomlán go díreach leis an scríbhneoir. Íocfar ina dhá sciar í, agus beidh ar an scríbhneoir tuairisc dheiridh a sholáthar ag críoch na cónaitheachta a bheidh le seoladh go dtí An Chomhairle Ealaíon.

1.2 Cé atá i dteideal iarratas a dhéanamh?

Tá an chónaitheacht ar oscailt do **scríbhneoirí bunaithe** agus do **scríbhneoirí meánghairme** atá ag plé leis na réimsí seo a leanas: ficsean próis, filíocht, neamhfhicsean cruthaitheach, úrscéalta grafacha, nó ficsean agus filíocht do leanaí agus ógánaigh.

Le hiarratas cáilithe a dhéanamh, ní mór d'iarratasóirí na riachtanais seo a leanas a shásamh:

- Bheith ina gcónaí i bPoblacht na hÉireann.
- Teist foilsitheoireachta a bheith orthu sna réimsí seo: ficsean próis, filíocht, neamhfhicsean cruthaitheach, úrscéalta grafacha, nó ficsean/filíocht do leanaí agus ógánaigh. Ní phléifear le iarratais ó scríbhneoirí nach bhfuil ábhar foilsithe acu sna réimsí seo. Níl scríbhneoirí a phléann le réimse na drámaíochta amháin cáilithe le cur isteach ar an gcónaitheacht seo.

- Níl an chónaitheacht ar fáil ach do scríbhneoirí nach raibh cónaitheacht de chuid na Comhairle Ealaíon ná ó ollscoil acu i rith na bliana 2022. Ar mhaithe le deiseanna a chur ar fáil do raon leathan ealaíontóirí atá an coinníoll seo ann.
- De réir Dhualgas na hEarnála Poiblí um Chomhionannas agus Cearta an Duine, tá an Chomhairle Ealaíon tiomanta dá dualgas bearta dearfacha polasaí a chur i bhfeidhm chun comhionannas deiseanna a chur chun cinn dóibh siúd a chónaíonn in Éirinn, beag beann ar inscne, gnéaschlaonadh, stádas sibhialta nó teaghlaigh, creideamh, aois, míchumas, cine nó bheith ina b(h)all den Lucht Taistil. Ina theannta sin, tugann an Chomhairle Ealaíon aird ar leith ar chúlra socheacnamaíoch duine mar fhoras eile ina gcaithfear comhionannas deiseanna a chinntiú. Cuireann An Chomhairle Ealaíon fáilte roimh iarratais a léiríonn ilghnéitheacht shochaí na hÉireann, lena n-áireofar na gnéithe thuasluaite agus ceann ar bith eile mar iad.

1.3 Conas iarratas a dhéanamh

Ní mór do scríbhneoirí na trí cháipéis seo a leanas a chur ar fáil:

1. Togra mionsonraithe 1-2 leathanach ina leagtar amach conas a rachfaí i bhfeidhm ar mhic léinn, foireann agus pobal na hOllscoile, agus taithí ábhartha a thacódh le cur chuige mar sin;
2. Ráiteas aon-leathanaigh ón scríbhneoir ina gcuirtear síos ar an tionchar a d'fhéadfadh a bheith ag an gcónaitheacht ar a c(h)leachtas cruthaitheach féin;
3. CV, nach faide ná 3 leathanach, ina sonraítear go mion éachtaí/gaiscí ealaíonta go dtí seo.

Seoltar iarratais chuig: An tOllamh Ciarán Mac Murchaidh (ciaran.macmurchaidh@dcu.ie) faoi **5.30pm ar an 29 Meán Fómhair**. Ní ghlacfar le hiarratais ach ar an rphost amháin. Ní ghlacfar le hiarratais tar éis an spriocdháta.

1.4 An Próiseas Measúnaithe

Tar éis an spriocdháta, déanfaidh An Chomhairle Ealaíon agus Ollscoil Chathair Bhaile Átha Cliath cinneadh faoi cháilitheacht na n-iarratas a fuarthas.

Measfar d'iarratas a bheith neamhcháilithe agus ní rachfar ar aghaidh leis sa phróiseas iarratais más fíor d'aon cheann de na raitis seo ina leith:

1. Cailleann tú an spriocdháta d'iarratais.
2. Ní chomhlíonann tú na riachtanais cháilitheachta a luaitear in 1.2.
3. Ní aighníonn tú na trí cháipéis riachtanacha a luaitear in 1.3.

Ina dhiaidh sin, eagróidh An Chomhairle Ealaíon agus Ollscoil Chathair Bhaile Átha Cliath coiste roghnúcháin ar a mbeidh ionadaí ó Ollscoil Chathair Bhaile Átha Cliath, ionadaí ón gComhairle Ealaíon agus ball seachtrach ag a bhfuil saineolas liteartha. Cuirfidh an coiste roghnúcháin gearrliosta d'iarratasóirí le chéile bunaithe ar na critéir seo a leanas:

- teist ealaíonta an iarratasóra
- caighdeán an smaoinimh/chur chuige (luaite thuas), mar a shonraítear san iarratas é, agus an tionchar féideartha a d'fhéadfadh a bheith aige ar an Scoil atá i gceist agus ar an Ollscoil trí chéile
- tionchar féideartha na cónaitheachta ar chleachtas cruthaitheach an scríbhneora féin

Aontófar gearrliosta (nach mó ná 4 scríbhneoirí). Glaofar scríbhneoirí gearrliostaithe chun agallaimh i lár mhí Dheireadh Fómhair. Reáchtálfar an t-agallamh trí ghlaoch físchomhdhála. Tabharfar deis do scríbhneoirí ar an ngearrliosta a bpleananna agus a dtaithe a phlé go mion san agallamh. Déanfaidh an painéal an cinneadh deiridh bunaithe ar na critéir thuasluaite agus cuirfear cinntí in iúl i mí na Samhna.